

四庫全書

集部

欽定四庫全書

宋詩紀事卷十七

錢塘厲鶚撰

強至

至字幾聖錢唐人慶歷六年進士刻苦攻詩韓
魏公甚重之官祠部員外郎有集

墨蟹

瑣瑣江湖中忽在幽人壁短螯利雙鉞長跪生六戟骨
眼驚自然熟視審精墨初疑蟪穴束猶帶浮泥黑橫行

竟何從躁心固已息終朝牆壁閒頗有肥霜色我來空
持杯左手莫汝食誰奪造化功生成歸筆力

蟹略

賈麟自睦來杭復將如蘇戲贈短句

春風那復繫狂游朝醉桐江暮柳洲大手千篇隨地掃
一身四海逐雲浮榮名不落閒宵夢退築聊為晚歲謀
老橘殘鱸猶有興片心還起洞庭舟

瀛奎律髓

句士良

士良成都人慶歷六年進士

和吳中復太守春遊海雲寺

佛土依山福遠州春行繡騎上雲頭補天彩石盈池在
朝海清江繞寺流四國仰煩卽伯勞羣生翹望謝安遊
早知為礪為霖意惟有西民欲暫留

成都文類

陳舜俞

舜俞字令舉烏程人慶歷六年進士嘉祐四年
登制科歷都官員外郎坐詆新法謫南康酒稅
赦還卒嘗居秀州之白牛村自號白牛居士有

集

棲賢寺

辟蛇行者應開寺拭眼高僧尚有墳龍帶雨歸三峽水

烏銜花出五峯雲

方輿勝覽

騎牛歌

我騎牛君莫笑人間萬事從吾好千金市骨駿馬來乘
肥大躍湏年少蒲為鞭草為轡瀑布山前松徑裏看山
聽水要行遲輕策緩驅塵不起布袍葛帶烏接羅山家

裝束不時宜，匏尊注酒就背飲。皁囊貯書當角垂，我狂吟醉欲倒同醉同吟白雲老。此老不可天下人一住廬山三十春，聲如洪鐘目如電，七十神光射人面上。牛下牛不要扶，合與山中作畫圖。汴州馬上顧何如？春泥沒腹仍濺帽，夜半歸來人亦瘠。天真喪盡百憂集，衣食毛髮歸妻拏，爭如來騎牛。水光山色俱悠悠。

梅堯詩話：陳舜俞令舉嘉禾人，慶歷中登進士乙科。嘉祐四年中制科，宰越之山陰，秩滿當召試館職。會朝廷行青苗法，上書力詆，時政謫監南康軍酒稅，到官與劉太博疑之日，跨雙犢以

窮匡廬泉石之勝此歌世爭傳之後遇赦還鄉
絕意仕進元豐中卒葬於吾鄉南門外之蘇灣
距城僅三里許過者必式焉

淵明醉石

活活飛泉清繞石悠悠天幕翠鋪空是非分付千鍾裏
日月銷磨一醉中柳絮任飄荒徑畔菊花仍在舊籬中
水聲山色年年好尚使游人想素風

廬山紀事

和開祖丹陽別子瞻後寄

仙舟繫柳野橋東會合情多勞謫翁相對一尊浮蟻酒

輕寒二月小桃風
羈懷散誕謳歌裏
世事縱橫醉笑中
莫恨明朝又離索
人生何處不怱怱

瀛奎律髓

林屋洞

洞天三十六第九曰林屋神仙固難名
瓌怪存紀錄曠
歲懷尋賞茲晨幸臨矚
馳神在真游豈復懦深谷解鞵
納芒履然松命光燭初行已偃僂
漸入但匍匐顧瞻避
衝磕潯淖沒手足如此百餘步始可立
寓目或垂若鐘
虡或植若旌纛有如案而平有如几而曲
鐫刻非人工

晶瑩燦黃玉遙知竅穴外定有金庭錄凡肥不可往叩
擊安敢黷鸞鳳無消息但見白蝙蝠却還望微明既出
猶喘促霑衣憐石髓孰悔泥塗辱庶幾達微慕養生相
吾福

毛公壇

古壇疊亂石草木何參差黃衣守其傍陳蹟刊豐碑曰
初劉真人齒髮不可訾但見紺綠毛被體髮髮垂雲輶
一日去空山畱庭壘弟子散巖谷荆榛蔽荒基晚有周

息元探訪親斬披白鹿忽跪前靈符見歲蕤地勝人既
偶凝嚴起寶祠束帛下幽聘良馬維素絲前朝揖高風
有美皮陸詩殆今三百年事去物亦隳喬松委樵蘇野
蔓號狐狸惟有鍊丹井甘冽無等夷一酌匪消渴飲慕
尚神禧

以上震澤編

王存

存字正仲丹陽人慶厯六年進士神宗朝歷龍
圖閣直學士知開封府拜兵部尚書哲宗朝累

官尚書左丞以端明殿學士知蔡州紹聖初提
舉崇禧觀致仕卒贈左銀青光祿大夫與黨籍
史院席上奉和首相吳公元韻

上聖論思著前言撫緒餘瓊筵初賜醴石室載紬書微
範貽來者功成念昔歟欲知開局盛門擁相君車

揮塵

後錄

遊焦山

連山擁滄江峭絕視茲鮮由來一氣結殊不麗衆巘林

深鳥聲悅境靜人自遠方吾抱幽介對此萬慮遣

京口

三山志

登北固山

晚登北固頂俛視南徐城廢壘何茫茫山川迴縱橫千載競誰有六朝空戰爭豪氣不可問古墳人正耕

過丹陽舊居

漂泊經故國繫舟款柴扉破屋他人居昔鄰今或非父老迎我飲祝我晝錦衣我謝父老言朴拙非所祈一官

走塵土實迫寒與飢去鄉未幾載頗覺儔侶稀人事已
可嗟況當白首歸泚泚練塘水綠楊蔭漁磯有田尚可
耕誓將父老依

以上鎮江府志

句

珠韞錫御恩猶在玉輦親扶事已空

孔平仲談苑光獻曹太皇嘗作珠子鞍轡上施
紅羅銷金坐子賜神宗神宗駕幸金明池遂乘
此韞太皇太后病稍聞神宗親製一小輦極為
輕巧以珠玉黃金飾之進於太皇遂載而之涼
殿太后扶其左神宗扶其右太皇下輦曰官家
太后親自扶輦當時在曹家作女時安知有今

日之盛喜見顏色王正仲進光獻挽詞云云蓋用此兩事也

韓絳

絳字子華靈壽人徙雍丘忠獻公億子慶厯中進士歷翰林學士御史中丞神宗朝拜同中書門下平章事封康國公卒贈太傅謚獻肅

韓元吉桐陰舊話獻肅公諱絳字子華發解過省殿試皆第三以元祐三年三月薨皆三數亦異事也故蘇魏公挽詩云三登慶厯三人第四入熙寧四輔尊蓋公自樞副遷參政宣撫陝右即軍中拜昭文相再入史館相也

復齋漫錄子華兄弟皆為宰相其家呼為三相
公呼持國為五相公云又京師人呼為桐木韓
家蓋公家門有梧桐木取為稱以別魏公子華
沒陸農師為挽章以記之所謂棠棣行中為宰
相梧桐名上識韓家是也子華以辰年辰月辰
日辰時薨農師又詩云非關庚子曾占鵬自是
辰年併值龍

游鴻慶院

久旱雨初足樂游春正深
喧闐觀士女清曠入山林
佛界雲成寶僧園地布金
方塘探子石高閣盍朋簪
沙水通溪白松筠逐徑陰
紛華從滿目幽寂自虛心
印組端

為累巖局得暫尋晚風吹綠野歸騎已駸駸成都文類

和范蜀公題蜀中花圖

徑尺千餘朶矜誇古復今錦城春物異粉面瑞雲深賞
愛難忘酒珍奇不廢金應知色空理夢幻即懽心聲畫

集

謁仙翁祠書山蓀亭

玉井不可到玉泉聊可尋馬行穿亂石人語入深林川
迴沙明色溪喧谷響音我來方六月雲榭一披襟華嶽

韓維

維字持國絳弟以廕入仕英宗朝累除知制誥
神宗即位為翰林學士加承旨元祐初拜門下
侍郎以太子少傅致仕紹聖中坐元祐黨謫均
州安置元符初復官卒有南陽集

寄孔寧極

雨滴菴上茅風亂窗前竹繁聲互入耳欲寐不得熟緬

懷田舍翁石徑滑馬足連山暗秋燈一路何處宿

過庭錄持國守許孔居邳常具車馬邀致郡治之養真菴同衾促膝快論人間事久而後歸一夕大雨孔告還持國獨寢菴中寄詩云云

下橫嶺望寧極舍

驅車下橫嶺西走龍陽道青煙幾人家綠野四山抱
烏啼春意闌林變夏陰早應近先生廬民風故醇好

王直方詩話韓持國嘗有詩云青煙幾人家綠野山四抱當時無不傳之

同曼叔游菩提寺

高城如破崖寺帶喬木古禪房掩清書佛畫剝寒雨荒
池野蔓合濁水佳蓮吐蕭條聯騎游淡薄對僧語秋風
日夕好勝事從此數

盧溪

盧攜讀書處

伊人沒已久溪溜亦如綫淳氣揖老僧清陰坐春院始
悟入山深幽林鳥聲變

西溪

我從南嶺來引轡下雲木不知溪流處但見翠蒲谷涼

葉覆山泉修篁翳茅屋

奉同原父賦澄心堂紙

江南國土未破前澄心名紙世已傳高堂久傾不復見
誰謂此物猶依然當時萬杵擣雲葉鋪出几案滑且堅
剡溪藤骨不足數蜀江玉屑誰復憐君臣嬉燕盛文采
駢章麗句關巧儼一朝零落隨散地中原篋笥生光鮮
君安得此尚百幅題以大句先羣賢羣賢落筆富精麗
瓊琚寶玦相鉤聯嗟予材力豈當敵雖欲強賦何能妍

獨耽玩物古所戒崇尚浮藻政豈先江南可哀紙可惜
後有觀者存吾篇

王直方詩話澄心堂紙乃江南李後主所製國
初亦不甚以為貴自劉貢甫首為題之又邀諸
公賦之然後世以為貴重貢甫詩云當時百金
售一幅澄心堂中千萬軸後人聞名寧復得就
今得之亦不識文忠公詩云君不見曼卿子美
真奇材久已零落埋黃埃君家雖有澄心紙有
敢下筆知誰哉梅聖俞云寒溪浸紙春夜月敲
冰舉簾勻割指焙乾堅滑若鋪玉一幅百金曾
不儼東坡云詩老囊空一不留一番曾作百金
收又從宋肇求此紙云知君也厭雕肝腎分我
江南數斛愁

同化光陪寧極之渚陽城

不踏南溪路于今又幾春能來共聯轡還是舊游人載
酒真乘興談經或入神歡餘不無媿林壑可還身

杜君章家賦海棠

濯錦江頭千萬枝當年未解惜芳菲而今得向君家見
不怕春寒雨溼衣

石林詩話韓持國雖剛果特立風節凜然而情
致風流絕出時輩許昌崔象之舊第今為杜君
章所有廳後小亭僅丈餘舊有海棠兩株每花
開時持國輒載酒日飲其下歲以為常至今故

老猶能言之韓忠獻公嘗帥蜀持國兄弟皆侍
行尚少故前兩句云

醑醑

平生為愛此香濃仰面常迎落絮風每恐春歸有遺恨
典刑猶在酒杯中

以上南陽集

程伯淳自洛過訪時范純禮亦居潁昌作詩示之
閉門讀易程夫子清坐焚香范使君顧我未能忘世味

綠尊紅妓對斜曛

茗溪漁隱叢話

句

數畝家園荒杞菊一池秋水沸龜魚

雪浪齋日記韓持國句前人評云沸字直錢

一笛西風吹落日滿帆行客背孤城合璧事類後集

韓 績

績字玉汝維之弟第進士英宗朝歷淮南轉運
使神宗朝累知樞密院事哲宗朝拜尚書右僕
射兼中書侍郎出知潁昌府以太子太保致仕
卒贈司空崇國公諡莊敏

桐陰舊話莊敏公績初求字於歐陽文忠公
以小合幅紙書玉女二字送來莊敏大不樂明
日相見猶有愠容文忠公曰出處無點水君何
怪邪取筆添女字三點相與一笑蓋詩中王欲
玉女但音發作汝也前輩亦雅戲如此

茗溪漁隱叢話東坡云韓縝為秦州酷暴少恩
以賊殺不辜去官秦人語云寧逢乳虎莫逢韓
玉汝孫臨最善滑稽尤善對或曰莫逢韓玉汝
當以何對臨應聲曰可怕李金吾天下以為口
實可怕李金吾乃杜子美詩

東山寺

久有東林約因乘暇日游眼明初出郭神王欲凌秋野

曠騫孤隼江清颺遠鷗近山青嶂合多稼綠雲浮雞犬
聲相接溝塍水亂流度橋喧從騎環樹轉鳴騶問俗驚
堯壤尋僧到沃洲深沈開寶闥磅礴輶華輶像設嚴珠
殿經聲隱絳幃仰看香剎直徐步畫廊脩遇物皆周覽
逢軒即少畱前庭初顯豁後徑轉深幽野嶺蒼筠麗霜
楓赤葉稠隔牆聞好鳥循沼玩游鯈翠榦梭纔剝紅芒
稻半收凌虛登陞道市境對岑樓暗谷藏危棧平沙際
別州川原同聚沫身世劇浮鷗回首飄鄉思臨尊浣客

愁清閒資善奕決勝在冥搜影動穰苴表風生曲逆籌
歸鞍不敢緩斜日照文楸

四朝詩

邵亢

亢字興宗丹陽人舉茂才入等神宗朝歷樞密
直學士知開封府拜樞密副使以資政殿學士
知外郡卒贈吏部尚書謚安簡

寄吳處厚

流年真似隙中駒別後情懷懶更踈天上又頒新曆日

牀頭未答故人書殷勤羔雁工曹檄狼藉杯盤上客魚
好在仲宣家萬里從軍苦樂定何如

青箱雜記樞密邵公元謂余詩似樂天熙寧中
余辟定武帥幕公自鄆附所作詩一軸并寄余
詩

張 掞

掞字文裕齊州歷城人舉進士累遷龍圖閣知
成都軍英宗朝為戶部侍郎致仕熙寧中卒

賀執政入東西府

熙寧中始建東西府宣執政遷
秩借官車輦仍賜御筵

五仙同日集蓬萊玉宇珠簾次第開乍向壺中窺日月
猶疑海上見樓臺光生金鉉調元地榮極璿樞命世才
共荷聖賢天地寵定知霖雨及時來

李壁王荆文公詩注

丁偃

偃蘇州人仁宗朝進士

句

白虎前芳掩金華舊事輕天心非不寤垂意在蒼生

省試

通英延誥藝 溫公詩話

郊修輔

修輔慶歷中以大理寺丞為豐城令至和元年

為奉化令

隱潭

在奉化縣西北

在昔知何人鑿破青山骨飛泉直下來千尺瀉倏忽兩
壁蒼翠間一陣風雷突傍無塵埃蹤中有蛟龍窟寒氣
不可嚮猛勢豈能屈安得當年為霖濟羣物

四明龍

蒼

張師錫

師錫開封襄邑人工部侍郎去華子仁宗朝仕

至殿中丞

老兒詩五十韻

鬢髮盡皤然眉分白雪鮮週遮延客話偃僂抱孫憐無
病常供粥非寒亦衣綿假溫衾擁背借力杖搯肩貌比
三峯老年過四皓仙喚方離枕上扶始到門前每愛烹
山茗常嫌釘石蓮耳聾如塞續眼暗似籠煙宴坐羸凭

几乘騎困韉鞭頭搖如轉旋脣動若抽牽骨冷愁離火
牙疼怯漱泉形骸將就木囊橐尚貪錢膠睫乾眵綴黏
髭冷涕懸披裘腰嬾繫濯手袖慵揎擡舉衣頻換扶持
藥屢煎坐多茵易破行少履難穿喜婢裁裙布嗔妻買
粉鈿房教深下幕牀遣厚鋪氊琴聽憐三樂圖張笑七
賢看經嫌字小敲磬喜聲圓食罷羹流袂杯餘酒帶涎
樂來須遣罷醫到以相延裹帽縱橫掠梳頭取次纏長
吁思往事多感聽哀絃氣注腰還重風牽口更偏墓松

先遣種誌石預教鑄客到唯求藥僧來忽問禪養茶懸
竈壁曬艾曝簷椽怒僕空睜眼嗔兒謾握拳心驚嫌蹴
踰腳軟怕秋千局縮同寒狔推厖似餓鳶觀瞻多目眩
舉動即頭旋女嫁求紅燭男婚乞綵錢已聞頒几杖寧
更佩韋弦賓客身非與去聲兒孫事已傳養和屏作伴如
意拂相連久棄登山屐惟存負郭田呻吟朝不樂展轉
夜無眠呼稚臨牀畔看書就枕邊冷疑懷貯水虛訝耳
聞蟬束帛非無分安車信有緣伏生甘坐末絳老讓行

先拘急將風夜昏沈欲雨天雞皮塵漸清齟齬食頻填
每憶居郎署常思釣渭川喜逢迎佛會差赴賞花筵徑
狹容移檻堦危索減輒好生焚烏網惡殺拆漁船既感
桑榆日常嗟蒲柳年長思當弱冠悔不賸狂顛賓退錄

喜子登第

御榜今朝至見名心始安爾能俱中第吾可遂休官賀
客留連飲家書反覆看世科誰不繼得慰二親難

詩話
總龜

楊備

備字修之建平人億之弟慶歷中為尚書虞部

員外郎分公司南京上輕車都尉有姑蘇百題金

陵覽古詩

鶚按景德建康志載作金陵詩者楊備字修之張敦頤六朝事蹟作楊修

今據文獻通考當與中吳紀聞所載姑蘇百題俱屬楊備六朝事蹟作楊修者筆誤也

夢中作

月俸蚨錢數甚微不知從宦幾時歸東吳一片煙波在
欲問何人買釣磯

中吳紀聞楊郎中天聖中為長溪令夢中忽作詩云云及寤心潛異之明道初宰華亭俄丁內

韓遂家于吳中樂其風土之美安而弗遷因悟
夢中所作幾于前定嘗效白體作我愛姑蘇好
十章又作姑蘇百題詩每題箋釋其事

蠡口

霸越勲名閒世才五湖煙浪一帆開猶防烏喙傷同輩
此地復招文種來

華山精舍

巖屏晚樹噪寒鴉嵐翠樓臺釋子家池面鑑光功德水
金波影裏石蓮花

汎太湖

漁舫載酒日相隨
一笛蘆花深處吹
湖面風收雲影散
水天反照碧琉璃

姑蘇臺

山花野草一荒丘
雲裏驕奢舊蹟留
珠翠管弦人不見
上頭麋鹿至今遊

響屨廊

步步香翻羅襪塵
粉紅花豔滿宮春
傾城一笑無遺迹

不見長廊響屨人

洗馬池

在蕪州郡學南

一一牽來種是龍
臨波深下更嘶風
金鞍玉勒拋何處
騰踏渥洼寒影中

以上吳郡志

新亭

滿目江山異洛陽
北人懷土淚千行
不知亡國中書令
歸老新亭是故鄉

晉新宮

玉案金爐對御牀
歸然應似魯靈光
螭頭直下雙魚尾
不讓西京舊柏梁

蠶堂

摘繭抽絲女在機
茅簷葦箔舊堂扉
年年桑柘如雲綠
翻織誰家錦地衣

臺城

六朝遺蹟好山川
宮闕灰寒草樹煙
江令白頭歸故國
多情合賦黍離篇

層城觀

亦名穿針樓

秋星如彈月如梳宮妓香添乞巧爐萬縷千針同一意
眼穿腸斷得知無

秦淮

一氣東南王斗牛祖龍潛為子孫憂金陵地脈何曾斷
不覺真人已姓劉

獨足臺

鳥跡分明在帝臺管弦聲裏戰書來回頭一覺風流夢

猶得朱門傍水開

胭脂井

擒虎戈矛滿六宮
春花無樹不秋風
蒼黃益見多情處

同穴甘心赴井中

以上六朝事蹟

張俞

俞字少愚益州郫人
屢舉不第用薦除祕書省
校書郎願以授父顯忠而自隱於家
文彥博治蜀為築室青城山白雲溪以處之
號白雲先生

有白雲集

宋史隱逸傳俞六名不應其卒也妻蒲氏名芝
賢而有文為之誄曰高視往古哲士實殷施及
秦漢餘烈氛氲挺生英傑卓爾逸羣孰為今世
亦有其人其人伊何白雲隱君嘗曰丈夫趨世
不偶仕非其志祿不可苟營營末途非吾所守
吾生有涯少實多艱窮亦自固困亦不顛不貴
人爵知命樂天脫簪散髮眠雲聽泉有峯千仞
有溪數曲廣成遺趾吳興高躅疏石通徑依林
架屋麋鹿同羣晝游夜息嶺月破雲秋霖灑竹
清意何窮真心自得放言遺慮何榮何辱孟春
感疾閉戶不出豈期遂往英標永隔抒詞哽噎
揮涕汎瀾人誰無死惜乎材賢已矣吾人嗚呼
哀哉

遊驪山

玉帝樓前鎖碧霞終年培養牡丹芽不妨野鹿踰垣入

銜出宮中第一花

青瑣高議

題漢州妓項氍羅

蜀國佳人號細腰東臺御史惜妖嬈從今喚作楊臺柳
舞盡春風萬萬條

邵伯溫聞見前錄慶歷間文潞公知成都府年未四十多燕集有飛語至京師御史何郯聖從因謁告歸上遣伺察之聖從將至潞公亦為之動少愚謂公曰聖從之來無足念因迎見於漢

州會有營妓善舞聖從喜之問其姓妓曰楊聖
從曰所謂楊臺柳者少愚即取妓之項帕羅題
詩云云命其妓作柳枝詞歌之聖從為之霑醉
後數日聖從至成都頗嚴重一日潞公大作樂
迎其妓雜府妓中歌少愚之詩以酌聖從每為
之醉聖從還朝潞公之謗乃息

楚中作

渺渺洞庭野蕭蕭黃鶴樓水通雲夢浦人渡沔陽舟廣
澤侵吳壤孤城接郢丘山分三楚斷溪入九江流寂寞
休兵月紛紜戰國秋吳生來赤壁魏武定荊州六代憑
形勢羣雄死寇讐淒涼帝子宅浩蕩彌衡洲萬里浮雲



暮千年故國愁武昌宮不見麋鹿自羣游

潘子真詩話

蠶婦

昨日入城市歸來淚滿巾
徧身羅綺者不是養蠶人

宋文鑑

謁白帝廟

孤山扞江口上有白帝祠
橫視天下險萬流皆俯窺
古殿鎖神物悲風出陰帷
天昏瓦棟折孤鼠亦生威
優巫日鼓舞鬼怪生奔馳
雷霆卷蛟窟電火燒松枝
入戶精

魄動有如陰兵隨吁哉漢盜亂海內遂崩離赤龍始潛
躍逐鹿過秦時公孫奮神劍定蜀圖安危隴坻開北戶
荆門啓東陲長驅百萬衆日闢天下師羣豪插羽翼與
漢爭雄雌兩帝不並立興亡良可悲天運雖有在聖賢
豈無為昭皇攬英傑襲軌奄重基自注先主武侯風雲共浩蕩
千古餘寒碑威神竟不沒萬里震南夷方輿勝覽

翠微寺

翠微寺本翠微宮樓閣亭臺數十重天子不來僧又死

樵夫時倒一株松清波別志

蘇麟

句

近水樓臺先得月向陽花木易為春

翰府名談蘇麟為杭州屬縣巡檢范文正鎮錢唐兵官皆獲薦書獨麟在外邑未見收錄麟入府獻詩云云文正薦之

王冲

次韻范公遊雲門 仲淹

高躡五雲堆平看萬象開樵風溪路遠華雨梵天來刹
倚三峯直鐘傳萬壑迴叨陪上方燕依約近中台

雲門志略

霍交

和趙閱道遊海雲山

山深藏古寺旁枕舊方池鼓響揭雲外石探從水涯使
旌遊不倦瑞麥獻相隨事簡民同樂歸心莫競馳

成都文類

任大中

大中字子固三衢人老于儒學作詩寒苦趙清

獻喜之

從清逸老人遊西山夜宿翠巖聯句

蒼龍天矯西北來鑿破明珠成碧岫

任

何人駕空起樓

閣地靈不敢藏餘秀

潘

鎖窗雲重衣巾潤梳木風清肌

骨透

任

客來一夜與僧談氣覺浩然充宇宙

潘

絕句

莫管流年一擲梭花前對酒且高歌
命中若有終須有

到底無時不奈何

以上潘子真詩話

送永倅周茂叔還濂溪

君去何人最淚流
老翁身獨宿南州
隨君不及秋來鴈

直到瀟湘水盡頭

廬山志

邢夢臣

和趙閱道游海雲山

使旌驅近郭
民宴列芳池
洩洩春臺上
沈沈暮海涯
鴻驚人宛轉
電激騎追隨
此會經年至
須防日似馳

成都文類

白贄

和趙閱道題新繁周表權如詔亭

亭名詔語密相沿
湏信從來教義全
肯構嘗探詩禮業
出綸特表父師賢
早安素履知文富
晚服朱衣稱賞延
不是韋家專講學
豈聞旂戟到門前

成都文類

石景立

景立溫州郡守

迎趙清獻公遊雁蕩

鴈蕩天台路險艱
多應特地隔塵寰
不辭登陟來千里

為是東南第一山爭望台星從海上方知蓬島在人間

武林二老圖中見重惜官師遠莫攀

雁山志

劉孝孫

和趙閱道題新繁周表權如詔亭

義方曾榜舊亭名子已為郎典要城身服上恩今日顯
詔符前語是人驚正如伯起鱸堂兆兼勝于公駟闕榮
試問繁江諸父老詩書何似寶金籛

成都文類

張球

上呂許公

近日廚中乏短供孩兒啼哭飯籬空母因低語告兒道

爺有新詩謁相公

青瑣高議

郭從周

從周西川人

贈何中正

三字來時月正圓一麾從此出秦川錢唐春色濃如酒

貪醉花間卧不還

翠屏筆談何龍圖中正初登第聞西川郭從周
精于卜乃以繅素求筮從周作一絕贈之云云
後自秦川移杭州而捐館舍從周之筮何其驗
歟

郊 僑

僑字子高亶子晚年自號凝和子鄉人謂之郊

長官

登翠微

崑山上方有僧屋曰翠微

行客倦奔馳尋師到翠微相看無俗語一笑任天機
曲沼淡寒玉橫山鎖落暉情根枯未得愛此幾忘歸

訪凌峯賢上人

步入凌峯閣尋師師未歸
凭闌寂無語唯見白雲飛

為簡公約賦素琴堂

素琴之堂虛且清
素琴之韻淪杳冥
神閒意定默自鳴
宮商不動誰與聽
堂中道人骨不俗
貌龐形端顏瑩玉
我嘗見之醒心目
寧必絲桐弦斷續
嗚呼靖節已死不
復聞成虧相半疑
昭文阮手鍾耳相
吞吐素琴之道詎
可論道人道人聽
我語紛紛世俗誰
師古金徽玉軫方

步武虛堂榜名無自苦

以上中吳紀聞


陳 翥

翥字子翔號咸鰲子又號銅陵逸民慶歷間布衣好植桐竹又號桐竹君作桐譜

桐竹君詠

高桐凌紫霞修篁拂碧雲吾常居其間自號桐竹君不解放俗利所希脫世紛會友但文學啓談皆典墳吁嗟機巧徒反道胡足云

桐譜



宋詩紀事卷十七

欽定四庫全書

集部

宋詩紀事卷十八

詳校官給事中臣鄧文泮

侍讀臣孫球覆勘

總校官進士臣繆琪

校對官中書臣朱斡

謄錄監生臣李學瞻

欽定四庫全書

宋詩紀事卷十八

錢塘厲鶚撰

馮京

京字當世鄂州江夏人皇祐元年舉進士鄉選
禮部廷試皆第一累官知制誥翰林學士旋擢
參知政事尋以觀文殿大學士出鎮河陽歷大
名彰德拜太子太師致仕卒贈司徒諡文簡有
鬻山集

詔修兩朝國史賜筵史院和首相吳公原韻

天密叢雲曉風清一雨餘三長太史筆二典帝王書按
武知何者霑恩匪幸歟吐茵平日事何憚汚公車

揮塵
後錄

謝鄂倅南宮城

嘗思鵬海隔飛翻曾得天風送羽翰恩比丘山何以戴
心同金石欲移難經年空歎音書絕千里常思道義歡
每向江陵試遺治邑人猶指縣題看

湘山野錄馮大參當世始求薦于武昌會小宗
者庸繆寡鑒堅欲黜落又欲置未綴時鄂倅南

宮城監試當拆封定卷大不平奮臂力主之以
公冠于鄉版果取大魁釋褐除荆南倅南宮遷
潭倅以詩謝之

句

琴彈夜月龍魂冷劍擊秋風鬼膽竄塵埃掉臂離長
陌琴酒和雲入舊山豐年足酒容身易世路無媒著
腳難以上鶴林玉露

沈邁

邁字文通錢唐人皇祐元年進士第二歷知杭

越揚三州官至翰林學士卒有西溪集

題山光寺寺在揚州

馬蹄輕蹙柳花浮醉入淮南第一州
不是青樓羞薄倖
自緣無錦不纏頭

高臺已傾池已平隋家宮殿春草生
千年往事何足歎
廣陵非復舊時城

送施密學守錢唐

塞外風烟河上塵歸來始覺二毛新
承明自厭頻趨直

滄海還思一濯巾幕府旌旗初壓境畫船歌吹便行春
湖山滿目舊遊在何日從公醉紫萼

南漪堂

山繞湖堂寺繞山平生願向此中間青雲白水相浮蕩
野客高僧獨往還年少自嫌軒冕累因循將恐鬢鬚斑
南漪最是逍遙地且挹清波濯媿顏

以上西溪集

和王微之漁陽圖

燕山自是漢家地北望分明掌股閒休作畫圖張屋壁

空令壯士老朱顏

聲畫集

天祿研匝歌

張君贈我古研滴四腳爬沙角如戟肉翼絡髀老獸姿
世不能名眼未識我知此為天祿兒口銜一寸黃金匝
蟾蜍嚼月兩吻圻天鯨胸穴雙泉飛玉聲琮琤珠迸落
影射巖石光灑潏未央書殿立髣髴曾見揚雄老投閣
子孫晚出中平閒渴烏翻車灑平洛宗資墓口臥露霜
頭角頓挫仍騰攫爾來拂拭傍几案眉目睢盱苔蘚剝

形模不入世俗用疑付大手傳糟粕未能點綴清廟頌

開闢大易摘春秋就令

闕五字

末勢猶足為遷彪

物無貴賤繫所用千金乞我直暗投圖書散落愈

闕下

晚歲惟有齋鹽謀學注蟲魚問老圃無乃塌颯為匹羞

緯畧

祖無擇

無擇字擇之上蔡人進士高第累官直集賢院

出知袁州入為龍圖閣學士權知開封府進學

士知鄭杭二州神宗朝知通進銀臺司知明州
坐事謫忠正軍節度副使移知信陽軍卒有煥

斗集

高齋詩話祖無擇晚娶徐氏有姿色議親之時
無擇為館職徐氏必欲諮相其人而無擇貌寢
恐不得當同舍馮當世丰姿秀美乃諭媒妁俟
馮出局揚鞭躍馬經過徐居曰此祖學士也徐
竊窺甚喜成婚始悟其非竟以反目離婚歐公
嘗作詩曰無擇聲名重當世早歲多奇晚乃偶
蓋謂此也

遊真陽石室

昔讀到難篇乃聞真陽室亦嘗怪斯人稱道或浮實邈
在數千里莫覩烟霞質青山有獨往吾志久矣必如何
騷俗駕尚此行朝紱繆分南顧憂惟刑在欽恤孤宦雖
云遠勝踐其敢失行行訪雲巖草木披蒙密呀然一穴
開勢欲吞朝日嵐光屏障展乳溜龍蛇屈溪流自清泚
松韻何蕭瑟酌酒飲遊客謂言此可述周生誠不誣所
紀窮纖悉惜哉非吾土無由寄蓬華平生丘壑心與道
共湮鬱難進而易退終當守儒術

唐周夔作到難篇謂
此洞離長安遠故到

者難也

途次金陵逢同年沈五判官

數載天涯別年來不定居扁舟忽相值孤抱信何如公

幹猶多病

奉述

孝先仍嬾書

自謂

人生從坎壈客意且躊躇

淡薄市橋酒鮮肥江岸魚可來同飲食勿笑此蕭疎

琵琶亭

晚泊湓江半客舟琵琶亭下動閒愁霓裳綠腰杳何許
楓葉荻花空自秋賈傅有才悲鵬鳥楚騷終古怨靈修

莫言司馬青衫溼今日行人亦涕流

以上祖龍學集

慈嚴院

在楊村風水洞太康間葛稚川捨宅為寺上元間賜額恩德大中祥符二年改今額

恩德傳名久慈嚴賜號新樓臺

闕三字

風水憶長春客

有披襟者時無洗耳人清音發鐘磬翠色混松筠佳合

登仙籍來宜出俗塵經年嗟倥傯半日喜逡巡席上詩

情逸樽中酒味醇忽忽又歸去自媿使君身

咸淳臨安志

盧石

盧石在宜陽門外東湖上唐狀元盧肇家石奇秀可愛宋守祖無擇徙置東湖

袁山之陽秀水側草履遺基誰氏宅皆云子發其姓盧

往以文章名籍籍宅中舊物何所存惟有嶙峋一巨石
闊纔三尺高倍尋久卧塵沙羣瓦礫余心好異因獨往
下馬環視聊拂拭地表可見十二三已足怪駭動魂魄
呼工運鐻塹其傍挽以長絙百夫力譙然鼓譟登大車
恍爾如蒙巨靈劈選置東湖最佳處四面澄波映天碧
倚空突兀無與鄰頓覺亭臺增氣色彎環幽竇莫敢探
恐有乖龍飛霹靂余嘗南遊到陽朔衆峯矗矗春筍植
捫蘿躡薜窮之徧若此奇卓曾未識郡人奔走來如雲

故老驚看復唧唧乃言此石遇真賞屈指于今年二百
沈埋曠代誰爾珍一日身價逾荆璧嗟余束髮大夫後
區區志尚惟忠直十年再謫非不窮猶慕堅凝無改易
如何故老不我愚感物再三形歎息石不能言人有言
勿使他時重堙阨

記萬載縣風俗

居民覆其屋大半施白瓦山際兩三家如經新雪下

以上

袁州府志

沈遜

遜仕為判官

和同年祖擇之韻

一自曾經別於今歎索居善交思柳惠多病是相如官
下頻無況天涯每得書舊懷長惋歎此會合躊躇曉露
生蘭苑秋風動鱸魚蕭然林野性與世轉為疎

祖龍學
集附

陳詵

詵官袁州通判

和祖擇之學士袁州慶豐堂十詠

存四

年長身多病閒鈔已試方
未甘先犬馬畢命報恩光
曉案三杯後閒烹北苑茶
色香俱絕品雪放滿甌花
雨霽輕埃息閒吟面曲池
遊鱗時對擲雙破碧漣漪
朝來因試筆閒荅故交書
莫怪音塵絕吾心與世疎

祖龍

學集附

蕭亢宗

亢宗廣陵人

奉和祖無擇郡守詠盧石

石是人非世所傳
宜陽城郭古山川
和光瓦礫曾無累
委質泥沙積有年
地僻久為神物護
時來方遇使君賢
介然作鎮東湖上
德政何當向此鐫

祖龍學集附

張徽

徽官朝議大夫上柱國致仕

聞祖擇之曾遊潁川西湖詩以寄之

河勢橫斜帶地形
碧旂丹旆昔常經
驛名未改風塵黑

碑字猶存雨蘚青薦福

寺名

園林倡杏渺擷芳

亭名

洲渚妓

娉婷汝南一值賢人降分野于今占德星

祖龍學集附

羅誘

誘鄉貢進士官教諭

和祖無擇太守九日登宜春臺

九日經年一再來不妨吏隱遣懷開時豐訟少欣多暇

秋晚花黃儘任催幸遇登高筵宴樂喜容落帽客追陪

預愁詔入三公去芹泮誰思樂育才

祖龍學集附

閻珣

珣江西運使

祖擇之學士惠示吏隱宜春郡十詩奉荅

達觀終知世事勞
利名都是一鴻毛
登瀛自有仙遊樂
緩帶何妨吏隱高
深意庇民躋富壽
正辭華國聳英髦
搏風九萬期鵬翼
且傲松軒弄彩毫

祖龍學集附

宋 攄

攄鄉貢進士

和祖無擇太守九日登宜春臺

登高佳節喜重來會客依隨五馬開
帽落秋風隨意適杯迎露菊趁時催
東籬幸有主人席絳帳那逢上客陪

時李泰伯預坐

欲報君恩話歸去不妨尊酒論文才

附祖龍學集

陳闌

闌字伯通仙遊人皇祐元年進士守知萊州

題梅仙山

先生吏隱寄南昌千里來尋物外鄉
汲水尚憐春井滯

藏丹猶發夜壇光鶴歸華表人何在犬吠雲深日自長
我擬重來訪遺跡手搯筇杖少徜徉梅仙事實

張公庠

公庠字元善皇祐元年進士有泗州集

道中一絕

一年春事已成空擁鼻微吟半醉中夾路桃花新雨過

馬蹄無處避殘紅侯鯖錄

遊白鶴山

初眠官柳未成陰馬上聊為擁鼻吟
遠宦情懷消壯志
好花時節負歸心
別離長恨人南北
會合休辭酒淺深
欲把春愁閒抖擻
亂山高處一登臨

能改齋漫錄張才翁風韻不羈初任臨邛秋官
郡守張公庠待之不厚會有白鶴之遊郡守率
屬官同往才翁不預乃語官妓楊皎曰老子到
彼必有詩詞可速寄來公庠既到白鶴便畱題
云云皎錄寄才翁才翁增減作雨中花詞寄皎
云萬縷青青初眠官柳向人猶未成陰據雕鞍
馬上擁鼻微吟遠宦情懷誰問空嗟壯志消沈
正是好花時節山城畱滯恐負歸心別離長恨
飄蓬無定誰念會合難憑相聚裏休辭金盞酒
淺還深欲把春愁閒抖擻春愁轉更難禁亂山高

處憑闌垂袖聊寄登臨公庠再生皎歌于側公
庠問之皎前稟曰張司理恰寄來令皎歌之以
獻台座公庠遂青顧才翁尤厚

宮詞

上番宮女捲簾時閃閃寒鴉拂曉啼纔索赭袍催進輦
紫宸門外報班齊

佳人唯是惜韶年嬾向紅窗理管弦錦席安排胡蝶局
深宮不忌賭金錢

太皞祠壇數級紅青旂搖曳日矇矓人閒未覺春風至

先入宜春小苑中

月華浮動上階棱
侍宴歸來掩繡屏
子夜酒醒蘭燭暗
碧紗窗外度流螢

十家宮詞

郡齋宴坐

為州容散誕真慰野人情
撼邾禪初悟搖頭句未成
試香秋院靜鬪墨午窗明
已有東歸計柴扉掩姓名

瀛奎律髓

盧秉

秉字仲甫湖州德清人
皇祐元年進士提點兩

浙刑獄加集賢殿修撰知渭州遷龍圖閣直學士提舉洞霄宮卒有文集

絕句

十月都門風薄衣擣砧聲裏雁南飛野人不識長安樂

且趁鱸魚一櫓肥

西溪叢話

題汴河驛中

青衫白髮病參軍旋糶黃糧買酒尊但得有錢畱客醉也勝騎馬傍人門

吟窗雜錄舒王見此詩尤極稱賞俄薦于朝數
年間遂超顯仕

孫覺

覺字莘老高郵人皇祐元年進士元豐初除右
正言歷外郡哲宗朝拜御史中丞提舉靈仙觀
卒紹聖中以元祐黨奪兩官徽宗即位復職有
集

聞朝議以子瞻送高麗

文章異域有知音鴨綠差池一醉吟
穎士聲名動中國

樂天辭筆過雞林節毛零落瓊吞雪辯舌縱橫印佩金
奉世風流家世事幾隨浪拍海東岑

合璧事類後集

介亭

在杭州鳳凰山太守祖無擇建

真人昔未起奔鹿駭四方連延天目山兩乳百里長有
地跨江海無種生侯王中宵燎穹旻列石表壇場朱旗
大梁野英氣通八荒寥寥百年後故物亦已亡所餘彼
巉巖峯巒屹相望主人承明老星斗工文章築亭紫霄
上坐客蒼林旁攀雲弄明月曉星出扶桑禹山隔波濤

簡書永埋藏願逢希夷使水土還故常

宋藝圃集

李育

育字仲蒙吳人皇祐元年進士

飛騎橋

魏人野戰如鷹揚吳人水戰如龍驤氣吞魏王惟吳王
建旗敢到新城旁霸主心當萬夫敵麾下倉皇無羽翼
途窮事變接短兵生死之間不容息馬奔津橋橋半撤
洶洶有聲如地裂蛟怒橫飛秋水空鷺驚徑度秋雲缺

奮迅金羈汗雷臆濟主艱難天借力艱難始是報主時
平日主君湏愛惜

避暑錄話吳志孫權征合肥為魏將張遼所襲
乘駿馬上津橋橋板撤丈餘超度得免故以名
橋今在廬州境中育有詩云云

錢公輔

公輔字君倚常州武進人皇祐元年進士知明
州進知制誥神宗朝拜天章閣待制知諫院出
知揚州

衆樂亭詩并序

衆樂亭居南湖之中南湖又居城之中望之真如方丈瀛洲焉以其近而易至四時勝賞得以與民共之民之遊者環觀無窮而終日不厭孟子曰獨樂與衆樂孰樂不若與衆衆樂之名于是乎書既又為詩以記真景之萬一云

誰把江湖付此翁江湖更在廣城中葦成世界三千景占得鵬天九萬風宴豆四時喧畫鼓遊人兩岸跨長虹

他年若數東南勝，須作蓬萊第一宮。
延祐四明志

寄題翠麓寺呈伯強寺丞

曩時曾作家山遊，亭有翠麓排新幽。
疎軒密牖竹鏘戛，烈風勁雨松飈飈。
呀然出戶瞰山足，屹然數竿圍上頭。
掃除雲峯聳客步，煎煮錫水供茶甌。
我時既合衆賓飲，醉岸山幘心遲留。
山僧顧我丐詩榜，詩未脫吻驚旋輒。
四方環走倏已晚，十載負約今相酬。
珍藍增葺想勝舊，我已白首縻藩州。
何當一賦歸去來，再款巖室空披搜。

吾宗道人正嘉遯擺脫世上無窮憂欣逢主人賢且令
泉石笑傲都相求上人灑掃莫暫閒行行逆我西來舟
惠山古今考

馮浩

浩仁宗朝集賢校理知鄆州

遙贈錢公輔

嘗聞衆樂亭未窺衆樂景今蒙貺新詩若得暫觀省萬
象盈紙來孤風隨筆騁丹青慙近工造化與遙領因識

主人懷殆非郡侯政所寄嬉遊中期歡衆庶競無俾一
夫愁將和四時盛此而推是心況乎持大柄青山綠水
佳百草千花勝吾將因宦遊異日細謠詠

鄧縣志

呂誨

誨字獻可開封人端之孫第進士官殿中侍御
史熙寧初為御史中丞與王安石不合出知鄧
州提舉崇福宮致仕卒贈通議大夫

和邵堯夫見寄時知鄧州

冥冥鴻羽在雲天
邈阻風音已十年
不謂聖朝求治理
尚容遺逸卧林泉
羨君自有隨時樂
顧我官閒飽晝眠
應笑無成三黜後
病衰方始賦歸田

聞見前錄

趙君錫

君錫字無媿洛陽人
舉進士為宗正丞
元祐中拜御史中丞
以天章閣待制出
知應天府
紹聖中貶少府監
分司南京入黨籍

紀事送太師潞公西歸

樂人多用教坊家席上羣公換口誇內裏宣來蕉葉蓋
御前賜出縷金花

坐上纔初佳句傳中官寫得便聞天聖人含笑搜尋了
依韻當時賜和篇

西苑重排餞會時新篇御製降彤墀明朝上巳無公事
赴宴臣僚總進詩

文昌雜錄趙君錫作小詩二十篇紀恩寵以送
潞公其尤為人傳誦者三章雖王建宮詞無以
過此也

姚闢

闢字子張金壇人皇祐元年進士歷官項城令
通州通判與蘇洵同修禮書歐陽公甚稱之

挽老蘇先生

羈旅都門十載中轉頭浮宦已成空青衫暫寄文安宅
白社長留處士風萬里雲山歸故國一帆江月照疎篷
世間窮達何須校只有聲名是至公

蘇集附

望文脊山懷瞿硎先生

文脊山中姓已逃江城爭美少微高應知司馬來窺鼎
便學秦人去種桃海上音書斷鴻雁洞中吟嘯伴猿猱
鹿裘誰識先生志卻把虛詞倚伏滔

寧國府志

范純仁

王辟疆

純仁字堯夫仲淹次子皇祐元年進士神宗朝
累擢天章閣待制哲宗朝落職貶永州安置建
中靖國初召為光祿卿分司南京卒贈開府儀
同三司諡忠宣與黨籍有集

寒食日泛舟

合友逢佳節，攜尊泛碧流。
溪風消酒力，烟樹入春愁。
羣鴨開波練，疎雲透月鉤。
平生懷古意，最愛五湖遊。

和吳仲庶春遊海雲寺

東郊行樂冠西州，古寺宮雉翠嶺頭。
化俗文翁傳愷悌，尋山謝傅繼風流。
天涯尊酒欣相遇，劍外三春得共遊。
雅興直須窮勝賞，年光難使隙駒留。

和吳仲庶龍圖西園海棠

丹葩翠葉競妖濃
蜂蝶翩翩弄暖風
濯雨正疑宮錦爛
媚晴先奪曉霞紅
芬菲劍外從來勝
歡賞天涯為爾同
卻想鄉關足塵土
只應能見畫圖中

和鄭通議青州范公泉

勝概因人得久存
此泉疏鑿自先君
澄源不負當時意
清影猶涵昔日雲
養正迴當深澗下
朝宗應與衆流分
今逢賢帥光陳迹
名逐新詩海內聞

遊嵩山與王弱翁聯句

靈境中天秀

辟疆

雄名古到今位尊朝列嶽

純仁

勢重壓千

岑靜鎖神仙宅

辟疆

高盤宇宙心孤棱標日月

純仁

絕仞倚

戈鐔彩棟靈祠邃

辟疆

層簷淨刹深民祈傳覲語

純仁

國祀

致君忱碑古苔生字

辟疆

堂虛畫蠹金山呼曾薦壽

純仁

神

降即為霖事怪塗山石

少室山下有啟母石

形端玉女砧峯

巒排翠玉

純仁

灘瀨漱鳴琴蕙帳人誰繼

辟疆

金泥迹可尋

唐經藏寶妙

純仁

魏殿想鸞音

會善寺魏文帝離宮

雲作他方

雨

辟疆

松連別院陰谷泉長浸斗

山有七星泉

純仁

頂路欲

捫參探穴夢潛動辟疆捫蘿力不禁箕熊分蟻垤純仁伊洛

認蹄涔鳥道樵夫去辟疆龍潭驛使臨衆仙停羽駕頂有八仙

壇純仁昔帝儼宸襟山有玄宗御容選勝先看記辟疆乘危可作

箴天門開四極山有東西二天門純仁樹品冠雙林少林有則天一品松

五品松靈藥看苗斲辟疆香醪挈榼斟道宮庭不埽純仁學

館突無黔山有書院龍麥風搖浪辟疆溪淙石聳簪雜花春

爛漫純仁老木夜蕭森夕照河光接辟疆晴嵐塔影侵深崖

藏積雪純仁虛壑響幽禽溪月寒澄霽辟疆巖烟暮杳沈寺

橋橫蟠螭

純仁

禪磬擊珎琳拂壁題新字

辟疆

逢僧舉舊吟

疲驂何處解

純仁

高閣在崎嶇

辟疆

以上范忠宣公集

王 霽

和吳公仲庶遊海雲寺

大帥新謠十五州殘春摸石是遨頭
氤氲喜氣隨民徧

冉冉風光盡日流野俗只知觀讌賞
主人非獨為嬉遊

晚迴都騎簫輦引觀稼郊原亦暫留

成都文類

馮 介

和吳公仲庶遊海雲寺

及時行樂慰刀州
曉背重城信馬頭
彩石散隨香被去
芳塵紛逐鈿車流
怱怱曲水當年會
草草東山舊日遊
不是海雲今獨勝
清風長共好詩留

成都文類

楊希元

和吳公仲庶遊海雲寺

三春行樂盛刀州
況是春光欲盡頭
使節在郊觀似堵
香輪爭道去如流
正逢鈴閣多閒日
肯對花時負勝遊

會得公心惜歡意欲歸猶自儘遲留

成都文類

張湍

和吳公仲庶遊海雲寺

海雲真賞甲刀州十里春光拂馬頭
花酒價高分宴樂
綺羅人好助風流出郊行旆從編俗
摸石居民事勝遊
斜日懽心猶未足
藩侯歸轡為遲留

成都文類

薛 綽

和吳公仲庶遊海雲寺

寺占靈峯更近州
喧闐騶從錦纏頭
歌鐘乍奏晴雷殷
戈甲急趨春水流
幾處醉眠方枕藉
一城謠俗重嬉遊
賢侯惠意民知否
幾刻嚴闔為爾留

成都文類

楊咸章

咸章字晦之蜀人

梵安寺內浣溪四老唱和詩有序

伏覩益之奉議尊兄欲于浣花梵安寺之普賢約漢
公子臧作三老會又築堂繪像榜曰三老誠蜀中之

盛事咸章方調官武信敢卜謝事少陪雅集輒更為
四老因賦拙詩上浼清覽

聞說懸車三老儒約為繪像訪僧居蟹螯杯酒歡無極
鼎足韜裘樂有餘暑簟共觀岷嶺雪春盤同膾蜀江魚
歸來一榻如相許須信逍遙倍二疏

成都文類

楊損之

損之字益之蜀人

宗弟晦之通直有詩陳武信歸筵三老之後損之

喜繼元韻以勉之

未拋名利尚區區方卜榮遷武信居思蓮林泉三老後
已經年紀七旬餘且來在野同遊鹿莫學臨淵卻羨魚
子美堂鄰願為約免教朋友舊情疎

成都文類

任傑

傑字漢公蜀人

傑衰朽無取辱益之見招同諸友為四老會晦之
承議有詩傑謹次其韻

夫子關西出衆儒
肯來尋我卜幽居
忘憂棊局真佳趣
投老詩篇是緒餘
故舊已蒙吟伐木
太平只恐罩嘉魚
主人醉指前溪路
松菊清涼月影疎

成都文類

楊武仲

武仲字子臧蜀人

武仲伏承益之奉議轉示晦之佳什謹依元韻次
和

素髮龐眉一陋儒
常陪龍友到禪居
我隨益者誠多幸

人歎賢哉媿有餘坐上共飛純玉斝腰閒齊佩白銀魚
高吟清論常終日會數朋交信不疎

成都文類

呂陶

陶蜀人

昨日漢公承議見召與三老友談笑大醉退而作
詩少謝勤意

六十年前里巷遊北歸重此接交儔據鞍矍鑠誇朱紱
把酒殷勤勸白頭況是三春逢美景何妨一笑斷多愁

閒中歲月非難遣，須得新詩事唱酬。

和吳公仲庶遊海雲寺

玉節重來鎮此州，暫驅千騎上峯頭。
春闌好為良辰惜，俗樂誰知急景流。
山色也疑今日盛，物情渾勝頃年遊。
登臨賦詠應難再，持語鄉人早借留。

以上成都文類

葛琳

和運使學士浣花亭韻

井絡西南區，成都號佳麗。
錦城十里外，物景居然異。
傍

縈浣花溪中開布金地杜宅巋遺址任祠載經祀

按蜀記梵

安寺乃杜甫舊宅在浣花去城十里大歷中節度使崔寧妻任氏亦居之後捨為寺人為立廟于其中每歲四月十九凡三日

衆遊樂于此

自昔歲一遊有亭久摧廢將期汎舟會

先此留旌騎弗基矧肯構後人莫予嗣冠蓋或戾止風雨無所庇我公至之初行樂徇人意杞車集賓組幕天陳燕器苟弗謀高明胡為革媮敝鳩工度材用奢儉求中制舉從縣官給下靡秋毫費巍然大厦成甚于折枝易藩條息偃暇時律清和際落成及休辰夙駕忻重詣

羣嬉逐使轂雜處同蠶市棟宇美可觀席筵陳有次芳
尊既罷撤綵舫安登憩夾岸布緹席中流喧鼓吹沂沿
烟靄閒禽魚共翔戲都人與士女疊足連帷被弄珠疑
漢曲浮觴均洛禊晡晡日將暮熙熙衆皆醉悅入武陵
源卻返塵寰世自是畢遨賞始復專民事農耕士就學
商販工居肆蜀邦生齒繁衣食良艱匱三時急耕播寸
壤無遺棄茲焉俾暇逸所以慰勤瘁上賴天子心慎重
坤維寄既擇邇臣德來秉諸侯瑞且命太史賢出攬澄

清轡第務廣教育孜孜布仁惠匪圖亟聚斂規規奉邦
計和氣斯涵濡羣生皆茂遂乃躋富壽域共樂升平治
不才備屬僚罔補公家利廕宇幸焉依雅聲慙善繼願
比召南篇永歌棠蔽芾

成都文類

貴著歲華紀麗譜四月十九日浣花佑聖夫人
誕日也太守出竿橋門至梵安寺謁夫人祠就
宴于寺之設廳既宴登舟觀諸軍騎射倡樂導
前泝流至百花潭觀水嬉競渡官舫民船乘流
上下或幕帟水濱以事遊賞最為出郊之勝

周敦頤

敦頤字茂叔道州營道人以舅龍圖閣學士鄭
向恩補官熙寧初累官至廣東轉運判官提點
刑獄因疾求知南康軍築室廬阜下號曰濂溪
嘉定中諡元公淳祐中封汝南伯從祀孔子廟
庭有集

同宋復古遊大林寺

三月僧房暖林花互照明路盤層頂上人在半空行水
色雲含白禽聲谷應清天風拂襟袖縹緲覺身輕

靜思篇

靜思歸舊隱日出半山晴
醉榻雲籠潤吟窗瀑瀉清
得閒方達士失計只勞生
朝市誰頭白車輪未曉鳴

題春晚

花落柴門掩夕暉昏鴉數點傍林飛
吟餘小立闌干外遙見樵漁一路歸

題濂谿書堂

元子谿曰濂相傳到于今此俗良易化
不欺顧相欽廬

山我所愛買田山之陰田間有清水清泚出山心山心
無塵土白石照沈沈潺湲來數里到此始澄深書堂構
其上隱几看雲岑倚梧或敲枕風月盈冲襟有時吟復
默酒罷鳴幽琴數十黃卷軸賢聖談無音窗前即疇圃
圃外桑麻林芋蔬可卒歲絹布足衣衾吾樂蓋易足名
濂以自箴誰為相朝暮岸木寒蕭森

以上濂溪集

郭 獬

送吳中復守長沙

初登西漢文章府便領吳王第一州
繞郭白雲衡岳近
滿帆明月洞庭秋

淵鑑類函

王吉

吉淮東人試校書郎

游琅邪呈銳公長老

踏石披雲一徑通
翠微環合見神宮
峯巒鬱密泉聲上
樓殿參差樹色中
子夜千溪分水月
清秋十里韻松風
平生久佇名山約
吟賞今纔信宿同

南滁會景編

周圻

圻尚書都官員外郎通判滁州事

游琅邪寺

杉松夾道綠森森
古寺尤欣結客尋
殿閣長時異香滿
亭臺佳處白雲深
清泉迸石落寒谷
幽鳥避人穿茂林
緩步閒看舊題詠
盆池蓮葉幾浮沈

南滁會景編

安昌期

昌期皇祐初舉進士調永定尉去官放浪山水

問

題清遠峽和光洞

蕙帳將辭去，猿猴不忍啼。琴書自為樂，朋友孰相攜。丹

竈非吾藥，青雲別有梯。峽山予暫隱，人莫擬夷齊。

萬姓統譜

趙

抗揚

抗揚拊二弟，皇祐間拊為江源令。抗揚與俱。

引流聯句有非序

江源縣江繚治廨址而東距三百步瀧湍馳激朝暮

鳴在耳使人聽愛弗倦遂畝渠通民田來園亭堦廡
閒環迴旋繞溝行沼渟起居游觀清快心目公暇事
休與弟抗揚坐東軒樂然盤桓共為詩章云

別派從江垠邀流入農畝淙淙來源深灑灑度溝淺疏
功浹旬畢溉利千步遠田觀疑澤潄坎聽類瓴建波行
拂落葉浸長浮生蘚孤鶴眼怪窺纖魚鬣跳展映葦色
莫分喧琴韻難辨增霖晨鬧蛙涵月夜驚犬憐黃澆菊
籬惜紫沃蘭畹吏治窻甕甕童戲芒車卷灌攜合手勞

漱掬致腰俛庭秋臨加涼軒夏向消烜我矜近濟能僮
賀遙沒免貯庀理巨甌歸廚架修笕供淘飯盎糧給澳
羹鼎鬻調藥修舊餌煎茶試新芽坐客頻泛觴蹲兒屢
滌硯聆寒心脫煩挹冷酒除面閒眺筇步隨靜看髭吟
撚高懷造文據清興團詩遣題為引流篇記耳非自銜

名勝志

宋詩紀事卷十八